

# Mir werrn dene die Zeit noch long mache

Doo konnsde hiekumme wo de willst, iwverall wird iwver die Rende gebabbelt. Die Junge hawwe Ängst dass nit vill kriehe unn mir Alde hawwe Ängst, dass von dem, was merr heit kriehe, immer wenicher iwverich bleibt.

Aach om Stommdisch im Herrsch hadde merr om letzde Sunndaach dess Thema druff. De Schorsch hott gesacht: No ja, mir Rentner werrn halt immer mehr unn außerdem kennese mett uns alles mache. Weil mir Alde sinn wie die Schoof, die zum Scheern oigefonge werrrn solle: mir ziehn de Köpp oi, mache noch nit emol Bäh unn denke, dann sehn unn heernse uns nit unn dann bleiwe merr ungeschorn.

De Karl hott geschennt: Kopp oizieh nutzt nix. Weil jetz muss aach noch jeder Rentner e Steuererklärung abgewwe, unn merr waaß joo wies iss, wennse Geld suche dann finneses aach. Unn habbt ihr dess gelese? - doo will doch so enn Hundt die Witwe-Rende kerze! Ei wenn mir Männer mol nimmi doo sinn, was bleibt dann ferr unser Fraue noch iwerrich?

Ich habb genickt. Wenn merr dess aach heern unn lese dut, was so moncher Jungpolitiker, so enn Spund, der selwer noch nie was geschafft hott, so von sich gibt, dann denkt merr monchmol, dene wärs om liebsde, mir dete allminonner so mett heechsdens sibbzich dess Zeitliche seechene.

De Karl hott alls weider geschennt: Unn wenn unser Kinner erst emol bis siwwenunnschzich schaffe misse, um die Alde zu bezahle, dann werrds nit long dauern unn aach die saache, weg mett de Alde, mir wolle selwer noch e bisje was vom Lewe hawwe.

De Schorsch druff: Dess Problem iss, mir lewe zu long. Unn wenn ooner von uns wirklich emol was hott, bauese uns e Ersatzdeil oi unn dann gehts grademol noch zeh Jahr weider.

De Karl konnt sich nit beruhiche. Doo käm monchem grad recht, dass die Voochelgripp kimmt unn mir Alde dann nor noch entsorcht werrn misse. Awwer so vill Hoffnung solle sich nit mache, weil doomols bei de Spanisch Gripp sinn mehr Junge als Alde gestorwe. Dess kimmt doodefoo, weil mir in unserm Alder hawwe schunn so monch Gripp gehabt unn schunn so monchen Virus iwverlebt.

Moont de Schorsch: Also missese uns e Pill gewwe ferr de sauwere Abfluch. Awwer die misse merr ersdens selbst bezahle unn zweidens unner Uffsicht von emm staatliche Flugbegleiter aach nemme, unn dann werrn merr verbrennt, inn so emm Oofe, der noch e Fernwärmeheizung betreiwwwe dut. Odder die mache ferr uns alles so deier, dass uns von de Rende nix mehr iwverich bleibt, mir dann om Lewe koo Lust mehr hawwe, uns in die kalt Stubb setze unn warde bis de Krappekasper kimmt.

De Karl hadd sich abgereecht. So leicht mache merr dess dene nit. Egal was kimmt. mir hawwe joo gelernt mit wenich auszekumme. Mir ziehn de Kopp oi, esse Brennesselsupp, klaue Wahlplakate unn heize doodemett unsern Oofe.

Ich saach: Unn mache Bäh. Mir werrn dene all die Zeit noch long mache.

Ich stump de Karl oo, de Karl stumpt de Schorsch oo unn mir drei stehn uff, gewwe uns iwver de runde Disch die Händ wie die Hondballer vorm Endspill, unn rufe zesomme so laut, dass merrs fünf Disch weit heern konn: Mir werrn eich die Zeit noch long mache. Bäh!

Eiern Honnes